

愚

齋

存

稿

愚齋存彙卷八十三目錄

電報六十

貴陽沈中丞瑜慶來電

寄上海岑宮保武昌瑞制台宜昌端大臣奉天趙制台  
廣州張堅白制軍來電

貴陽沈藹滄中丞來電

川督趙制軍爾豐寄內閣請代奏電

宜昌端大臣來電

又

附錄川京官致上海岑宮保電

武昌瑞制台來電

寄奉天趙制軍爾巽上海岑宮保春煊武昌瑞制軍澂  
宜昌端大臣方廣州張制軍鳴岐貴州沈中丞瑜慶雲  
南李制軍經羲

寄上海岑宮保奉天趙制軍武昌瑞制軍宜昌端大臣  
廣州張制軍

寄貴陽沈藹滄中丞

寄上海鎮江岑宮保天津陳制軍奉天趙制軍南京張  
制軍武昌瑞制軍宜昌端大臣長沙俞中丞廣州張制  
軍雲南李制軍貴陽沈中丞

桂林趙竺垣侍御來電

宜昌端大臣來電

廣州張堅伯制軍來電

廣東龍參議建章來電

宜昌端大臣致內閣請代奏電

川督趙季帥寄東督趙次帥電

寄上海鎮江探投岑宮保

寄上海岑雲階宮保

又

寄上海岑宮保轉交高子益方伯

愚齋存彙

卷八十三目錄

二

思齋樓藏版

上海岑宮保來電

又

廣州張堅帥來電

上海岑宮保致內閣請代奏電

宜昌端大臣來電

雲南李仲仙制軍來電

廣西沈幼嵐中丞秉堃致內閣請代奏電

川督趙季帥致內閣請代奏電

武昌瑞制軍來電

內閣寄貴州沈撫台上海岑宮保電

上海岑宮保致內閣請代奏電

蘇撫程中丞德全致上海岑宮保電

川督趙寄軍諮府電

上海岑宮保來電

又

宜昌端大臣致內閣請代奏電

貴陽沈藹滄中丞寄內閣請代奏電

宜昌端大臣來電

貴陽沈中丞瑜慶來電

寄上海岑宮保

愚齋存彙

卷八十三目錄

三

思補樓藏版

廣州張堅伯制軍來電

寄上海岑宮保武昌瑞制軍宜昌端大臣長沙余中丞  
廣州張制軍

愚齋存彙卷八十三

電報六十

貴陽沈中丞瑜慶來電

宣統三年七月二十四日

黔省軍隊本單兼以各路捕匪日夕不遑本無可分撥惟成都待援甚切不能不先其所急已飭令新兵營嚴裝以待得旨卽行十餘日可達如何示遵

寄上海岑宮保武昌瑞制台宜昌端大臣奉天趙制台  
七月二十四日

資牧漾電偵探行至距省百餘里亂民擋住搜獲公文

即殺斃傳聞會黨四城紮圍附者塞途兵匪相持內外  
隔閡各屬風聲甚惡時有打毀情事防營不敷分布乞  
速調援兵瀘局漾電川京官電已鈔送道州多刷及送  
自疏井據資局電省城日開一時進米榮城外營黨對  
紮相持會黨蔓延極衆云

廣州張堅伯制軍來電

七月二十四日

廣九鐵路開車舉行典禮前奉大部篠電聞港督  
亦欲蒞場囑岐前往接待現據趙總辦開具節略  
定在深圳車站行禮且聞港官赴港觀英路工深  
圳距省三百餘里若再至港往返總須兩日粵正

多事岐離粵兩日頗不放心茲擬派委交涉司勸業道爲岐代表接待港官似於交際無礙謹電聞貴陽沈藹滄中丞來電

七月二十四日

頃得重慶朱道梗電成都圍急援絕請派軍隊星馳赴援等語此亂正恐不小查各省相距較遠黔軍自不得不先行惟望午帥早到可以調度一切耳 朝命如何速示

川督趙制軍爾豐寄內閣請代奏電

七月二十四日

內閣王爺中堂鈞鑒十五日遵

旨拏獲首要隨

將圍攻督署亂民擊退曾於咸電具陳在案是日

分段派兵彈壓兵民仍多衝突直至三更城內始  
稍靜息而城外大麵鋪牛市口民團數千人夤夜  
已到城下據稱係由同志會調令十六日進城始  
知逆謀凶狡實非一朝一夕之故連日已到各團  
計西有溫江郫縣崇慶州灌縣南有成都華陽雙  
流新津及邛州蒲江大邑等十餘州縣一縣之中  
又多分數起民匪混雜每股均不下數千人或至  
萬人所到之處搶掠燒劫無所不爲附省居民紛  
紛逃徙陣獲之人訊供或稱係赴同志會召集有  
稱係羅蒲等大人調來保路者十四日卽已暗中

齊團亦有沿江得有同志會散布調兵木籤令來保護羅蒲諸人者今知渠等被擒特來救援並要求從此不納糧稅不准則圍城攻打當經調派陸軍及巡防軍衛隊一面謹嚴城守一面分路迎剿仍將該逆紳等謀叛情形分頭曉諭解散免致愚者無知誤犯兵民接戰時官弁等亦必先行勸解乃各該團恃其人眾勢強分四路圍城並放槍礮斃我兵士迫我軍開槍回擊猶敢抗拒至勢難支持始各紛紛散退嗣有大股匪數千人盤踞距省五十里之龍泉驛山頂陬守險要密列礮械揚言

進攻省城我軍馳往勦擊匪卽開礮轟打我軍於  
黑夜猛撲上山佔據山頂奪獲大礮數十具槍彈  
刀矛無算匪遂下山紛竄蓋龍泉驛爲東路要害  
該匪等意在阨險固守截斷省城聲援幸經立時  
攻奪不致爲其所制而西路犀浦中和場等處復  
有數千匪徒聚集縱橫於雙流等縣之間復經派  
兵防剿當卽敗退詎該匪旋又分股圍攻雙流縣  
城放火焚燒衙市勢甚危迫我軍躡蹤往援與匪  
接仗數次均獲勝利相持一晝夜城圍始稍鬆解  
其竄擾犀浦中和場並續竄唐家寺之匪亦先後

擊退刻據探報金堂什邡漢州等處又復紛紛告  
警猶須分兵往救查我軍自十六至今連戰七日  
防內攻外東馳西擊刻無暇晷爾豐隨時激以忠  
義犒以重賞各將士均尙用命雖所當輒靡擒斬  
甚多奪獲槍炮刀矛旂幟約二十餘件而民匪敗  
而復合前去後來竟成燎原之勢自十六日各路  
電杆悉破砍斷驛遞文報皆被截阻搜殺各處匪  
徒日益麇集迹其設伏守險圖扼東西要道陷我  
於坐困之地必有梟桀詭譎之徒主謀指使而西  
州漢充等處匪徒猶有分路來省之說兵數有限

備多力分恐倉卒未易殲除擬俟城守稍固卽抽  
隊赴剿以圖廓清其先後陣擒各犯中有被脅愚  
民均用善言開導悉予寬免省釋飭其勸告鄉里  
勿致誤蹈罪戾爲妥籌解散之計惟聞彼黨已密  
派多人運動各省諮議局及京外官紳意圖淆亂  
黑白爾豐一面通電各省督撫宣布其罪以免人  
民誤會或有牽動至現在籌辦防守所有籌畫餉  
需預備供給及賞卹救濟巡查地面各事宜自不  
能無總匯機關以資督率其臨時需用各款亦爲  
預算所不及刻已於藩署飭設籌防局妥爲辦理

俾得綜核再各路電報久已不通因前日將簡州  
匪股擊退始專馬賁稿至資州電局發遞是以具  
報稍遲合併聲明謹請代奏

宜昌端大臣來電 七月二十四日

壽帥電稱湘鐵路學堂下期開學急須經費約一  
萬餘元已由方暫允由湘藩司墊發將來此項經  
費必有所出墊發之項作何歸還乞酌定見示壽  
帥並云無款不能開學大不妥也收路在卽是以  
權允之

又七月二十四日 並致澤公

竊端方自鄂起行後途次迭奉電 旨並准瑞澂

奏撥鄂軍一標奉 旨暫歸端方節制調遣二十

一日在沙市恭讀 上諭端方帶隊入川務須申

明紀律嚴加約束不准搔擾並沿途曉諭居民宣

布德意等因欽此二十三日抵宜昌奉電 旨端

方現抵何處約計何日可到成都著卽日詳細電

奏等因欽此端方乘海軍部准調之楚同兵輪由

鄂趨催前進因楚同初次行駛岷江沙礁不熟沿

途探水前行稍形濡滯焦急萬分今日抵宜昌前

調之鄂兵兩隊業已先到續調之三十一標約遲

數日始能分期到宜當與荆宜道吳筠孫川鹽局  
總辦李孺宜昌府知府金世和熟商水陸進行之  
策旋奉 上諭川省大局岌岌可危 朝廷殊深  
焦慮昨已電飭端方尅期前進開缺兩廣總督岑  
春煊威望素著前任四川總督熟悉該省情形該  
督病勢聞已就痊著卽前往四川會同趙爾豐辦  
理剿撫事宜等因欽此查川省匪亂現止成都附  
近各處匪勢尙未蔓延川東川南探報並無暴動  
情勢光緒二十四年余蠻子之亂僅及川東二十  
八年紅燈教之亂僅及成都各屬全在地方官分

別良莠剿撫得宜無不迅卽殄滅立就蕩平皆未  
嘗重煩兵力此次匪亂有鄂軍陝軍前往助剿更  
得岑春煊曾官川督與川人誠信相孚必能樹彰  
燁之風聲駕輕車於熟路岑春煊現在上海趨程  
前進必可迅速抵川且川之釀亂雖出匪徒而啟  
釁之由終因爭路岑春煊養病閒居曾未與聞路  
事川人懾其威信必能立戢囂張端方奉命督辦  
路事持循國有政策本非川人之所歡迎若銜命  
前往在端方以宣布德意爲宗旨而川人終莫釋  
反對國有之梗頑趙爾豐經端方奏參復歸端方

查辦於事體實亦非宜端方現將援川鄂軍接濟  
進行各事宜業已會商瑞澂妥爲布置瑞澂所派  
之協統鄧承拔係方昔年造就拔識之人於軍事  
頗有歷練三十三標標統曾廣大光緒三十二年  
端方在兩江總督任內因甯軍赴太湖勦匪江防  
空虛曾奏調曾廣大統帶全標在江陰填紮極資  
得力此次入川必能迅赴事機至宜昌路工正在  
喫緊工役多至數萬人因川事亂耗頻聞人心不  
無疑慮端方正與瑞澂籌商防弭之計今日接郵  
傳大臣盛宣懷來電亦以此事爲慮刻正與川路

公司總理李稷勳妥商辦法川事既關重要鄂路亦宜兼籌應請明降諭旨飭令岑春煊會同趙爾豐專辦川省匪亂並請將川省水陸新舊各軍及鄂陝援軍均歸岑春煊節制調遣庶幾事權統一不致貽誤大局至宜昌路工關係川鄂兩境安危端方宜暫在宜昌預爲岑春煊籌辦軍事後路並將川路工役妥爲鎮撫於軍事路事兩有裨益用副朝廷維持路工慎固疆圉至意再湘鄂路事從前反對情形亦與川省相類端方與湘鄂士紳感情尙好迭經反復熟商始得次第就範刻值

收路在卽若非端方親往安置猶恐枝節橫生此事關係亦極重要合并陳明請代奏端方叩二十三日特聞

附錄川京官致上海岑宮保電

七月二十五日

川民因路釀此重案事變詳情遠難確悉竊念川民受國厚恩食毛踐土數百年稍有智識者豈忍自速其亂想係展轉誤會而起樹枓等聞警駭痛幸蒙聖恩廣大下勦撫兼施之詔而猶諄諄以分別良莠相誥誡恭讀二十三日諭旨至均係無辜赤子要在善爲解散等語未嘗不感激

涕零也川省一隅之治亂關係大局之安危我公  
威信素著川民舊託帡幪引領慕思已非一日此  
次奉 命入川尤深欣躍切懇帥節速發俾川民  
早慰霖雨之望并先電諭川東道徧傳通省曉諭  
解散無任馨香禱祝之至喬樹枏曾鑑施愚值年

趙熙胡駿黃德章李文熙暨同鄉京官等公叩

武昌瑞制台來電

七月二十六日  
諮府度支部

並致內閣軍

昨接岑督春煊電二十六日乘楚謙兵艦來鄂與  
激商議一切後卽行入川謹聞

寄奉天趙制軍爾巽上海岑宮保春煊武昌瑞制軍激

宜昌端大臣方廣州張制軍鳴岐貴州沈中丞瑜慶雲

南李制軍經羲

七月二十六日

有學生逃至資州稱成都城內尙安頃資電東門外匪黨被馬隊擊退至簡互有傷亡大股麤聚道路仍梗云雲帥有電奏尙未起節午帥已到宜昌

寄上海岑宮保奉天趙制軍武昌瑞制軍宜昌端大臣廣州張制軍

七月二十六日

頃接成都郵政洋員十九電稱城內情形官吏彈壓頗有把握華洋員照常到局辦公城外匪徒每日騷亂均經官兵擊退西藏老練軍隊有二千名到此云

寄貴陽沈藹滄中丞

七月二十六日

濠電昨由總協理進呈適值滇奏赴援須四十日陝奏  
竟推無兵惟公電不能不先其所急已飭新兵營嚴裝  
以待得 旨卽行十餘日可達攝座深爲贊許本日已  
有電 旨並卽咨照軍諮府務請迅速馳行至成都若  
干站統領何人新軍調往若干數不在多但宜求速行  
軍用款奏到必准十九成都來電城內官兵尙能攻擊  
城外亂民又調到援兵二千聲勢稍壯如貴軍一列便  
可解圍功誠不淺何日由何地拔隊乞速電示到城會  
合川軍仍可聽趙令雲帥二十六日由滬成行到必在

後矣

寄上海鎮江岑宮保天津陳制軍奉天趙制軍南京張  
制軍武昌瑞制軍宜昌端大臣長沙俞中丞廣州張制  
軍雲南李制軍貴陽沈中丞

七月二十六日

頃英使接十九成都消息趙督已將拘禁首事五人交  
將軍看管人心一定官又勒令開市各鋪亦多有遵從  
者總稅司接同日成都來電城內官兵勢尙足攻擊城  
外亂民亂民死傷甚多又有藏兵二千從外間調到等  
語資州電局有電東門外匪黨被馬隊擊退至簡州互  
有傷亡南門外大股匪集道路仍梗自流井陳京堂鍾

信養電資陽以下安謐如常云

桂林趙竺垣侍御來電

七月二十六日

並致澤

桂人聞兩部會奏感激之至桂路漸有頭緒麟接  
資政院電言會期在即麟日內由全回京遵 旨  
赴會兼將桂路情形面達鈞部蜀潮息否念甚麟  
有維持國有預定民志獨見容面罄

宜昌端大臣來電

七月二十六日

鄂路開工在即須派總紳以繫人望查有記名御  
史蔣楷知府劉洪烈熱心公益鄉望素孚已由敝  
處派蔣爲鄂境川漢總紳劉爲鄂境粵漢總紳各

月薪二百兩夫馬二百兩仍請由部加札委任除咨達外特聞

廣州張堅伯制軍來電

七月二十四日

川事頃聞報載遶鄂來電有新軍變鎮統自戕勸業道被殺法司自盡川督戮議局正副議長及保路代表美調艦入川各等語未審是否謠傳影響各省治安不細除飭禁繼續登載外惟電報來自外省卽不登報亦難靖謐查路事電報早經大部飭禁收發有案擬請重申前禁嚴飭京遶川鄂四局嗣後關於川事電報概勿收發至粵局已由岐

逕飭矣並聞

廣東龍參議建章來電

七月二十四日

現因川省亂事人心搖動與談路事皆掩耳而走  
從前布置均成畫餅奈何本日堅帥邀齊司道及  
章列會議廳出度郵兩電頗形憤恨以爲 朝廷  
置粵省於不顧開議三鐘莫展一是有主仍爭現  
銀者有主俟看川省亂事如何再定者有主事關  
大局不可專指路言請部三思者有主部款難籌  
宜共體諒請給四成有利票者未能決議而散章  
雖預聞未敢置議觀此情形目前問題斷難解決

也再昨由交通承領規元三十萬兩入來往日息帳上以備收股之用並聞

宜昌端大臣致內閣請代奏電

七月二十五日

成都電綫未斷以前趙爾豐電稱兵警皆不可靠日內趙爾巽自奉天來電亦云全鎮新軍只有三營可靠頃據李稷勳言川省民變可憂尙不知兵變更可憂一切軍械火藥及製造槍礮廠一爲亂黨所據川事皆不可問似此川中數年以來捐糜千百萬金錢教練新軍一旦有事竟無可靠之兵惟有暫用客軍以紓目前之急端方最先所調援

川之鄂軍兩隊已飭乘舟先發奉 旨續派之鄂軍一標亦於二十二三四等日由鄂分期乘輪來宜並派委員預行僱定船隻料理一切進行需用以便各營隨到隨卽前進各軍入峽後若不阻風十日內外可以到萬取齊登陸兼程赴援至川省近日軍情前已電飭川東川南兩道隨時探聞日內復飭查防守各營是否得力並詢以何營最爲可靠以便就近派援省城查成都十六屬民氣素稱強悍始則圍攻不散繼必四竄蔓延現在川東川南雖未遽聞響應然必須先事預防頃已電詢

雲貴總督李經羲貴州巡撫沈瑜慶雲貴兵力是  
否尙能兼顧及川卽兵力微有不敷亦宜調紮川  
南川東交界緊要處所以免川匪將來竄擾並可  
遙爲川省聲援倘事機緊迫再行拔隊入川俟得  
川黔復電請 旨辦理所有日內趕緊籌畫援川  
各事宜謹先電陳以慰 宸廑乞代奏

川督趙季帥寄東督趙次帥電

七月二十五日

川人爭路之熱至於極點皆由鄧孝可羅綸顏楷  
張瀾等鼓吹而成而蒲殿俊復暗中爲之主謀以  
爲後援竟致全省一致婦孺亦皆號泣雖百般開

導不能解釋故弟屢請早賜轉圜以定人心而端  
瑞反聯名奏參從中挑撥以致愈激愈烈變端愈  
雜該紳等見人心已附遂藉口保路保川自謀獨  
立然初無證據弟猶以正言告誡冀其改悔並密  
偵其舉動反觀其變一面暗中布置繼乃不納釐  
稅實行抗糧抗捐至十三而逆書見十六日而起  
事之說已確因於十三日將該逆紳等誘入署中  
一併拘留在蒲殿俊家搜得該逆黨寄羅綸信有  
倡舉大義資助槍彈等語更屬憑證確鑿當日午  
間同志會黨聚集萬人闖入督署禁之不可將及

大堂不得已飭令開槍斃數人始行退去不然較  
相變更烈十六日將明卽有亂黨麕集城下皆由  
逆紳喉之使來幸我有備內外戒嚴至今旬日無  
日不有戰事均經先後擊退去城將遠奪獲槍械  
刀矛無數旂幟皆書同志會民匪混雜前日陣擒  
數十人半係鄉愚立即省釋以爲解散之計雙流  
圍城七日昨始擊散匪雖未盡然尙力能制之兄  
可放心惟此事實非本願而大局所關不敢瞻顧  
知我罪我聽之可也電綫自十六日由省至資州  
皆斷南路亦不通今始將此路之匪打散專馬遞

送須由資轉發故稍遲也

寄上海鎮江探投岑宮保

七月二十五日

如春因公入川南無名稱擬請加欽差大臣以陶齋節制之軍隊畀之以一事權不知采納否聞各省伺隙而動惟願川事早了則眾閩自息又聞京中川黨密電川匪謂岑若兵多器利即便服從否則仍當抗拒公此行宜先聲後實乃克有濟匪燄甚張從前感情未必足恃自來民變終歸於撫若一無兵威必養癰成患如慮新軍無用長江有程允和原流防軍二十營現爲張勳接統公若奏調二千人派一統領帶去亦必允行蘇堪在

京感公知遇倘奏請隨行可備參謀端先電商未允非  
上聞不可

寄上海岑雲階宮保

七月二十五日

滬電局稟謁公知二十六坐兵船起節聞者快慰乃電  
奏尙未到不知何故陶齋來電料公亦電辭而自請駐  
宜專任路事卽日電奏云公此行實爲澤公再三密請  
次帥明請嘗聞公言國有急難必赴且此事公所優爲  
此地公足展布諒必不爲陶齋所料但旣奉 命似宜  
速行兵輪夜不能行不及招商局專派一輪直送較速  
宜昌至渝英德小兵輪恐不能借

又 七月二十五日

公此行宜坐商輪晝夜兼程直到武昌晤商華帥後直放宜昌已飭招商局遵照又宜奏請高子益同行事了由川赴滇甚便又宜請調黔軍昨愛滄電已預備十餘日可抵成都視鄂軍較速又宜迅速電奏起程日期目下以平亂爲先著路事暫可不提方與 諭旨相合

寄上海岑宮保轉交高子益方伯

七月二十五日

川亂借路事爲題今亂已成必須先行解散改綫一層只可留作善後之策公佐雲帥入川與中樞消息更通事必易定頃電雲帥改坐商輪直放宜昌以期迅速須

有投袂而起之概乃足以慰朝野之望

上海岑宮保來電

七月二十五日

七電均悉川省亂象將成旣奉 恩命起用萬不敢辭惟卧病數年賓僚隨從須一一招致斷無子身前進之理現已趕緊部署得有三數人卽可就道川事情形隔膜擬先撰勸導文告電川曉諭俟到鄂探悉詳情再定辦法本日已具電奏陳宸密由劉道送到並聞

又七月二十五日

前電甫發接徑電敬悉煊奉 命後原擬二十五

啟程乃招致幕僚均無回信祇得稍候如需商輪  
卽知照招商局可也子益今日到滬渠與煊相處  
有年心性素洽目下急切無人臂助擬奏調同往  
乞於澤公前先容能設法調補川藩指臂相聯尤  
爲感幸務乞贊助示復至盼

廣州張堅帥來電

七月二十五日  
支兩部

並致外務度

准鄂督電稱武昌電局接呈香港致鄂諮議局電  
稱盛激川變禍慘乞聯各省挽救川赴粵代表龔  
斡辰等語囑商港督拏解看管等因查川代表在  
港煽動勾結實爲隱患惟此等入犯照例不能提

解外埠與商恐難辦到擬請大部設法妥商英使  
轉電港督酌辦如實難提解請其驅逐離港亦可  
並乞賜復

上海岑宮保致內閣請代奏電

七月二十五日

七月二十三日奉電傳 上諭川省城外亂黨圍  
攻附近各府州縣亦煽惑鼓動大局岌岌可危岑  
春煊著卽前往四川會同趙爾豐辦理剿撫事宜  
卽刻啟程毋少延緩等因欽此春煊自大病後精  
神衰弱志慮短絀本不堪再爲世用今川省既有  
亂事蒙 恩起用 諭旨諄切萬不敢辭惟卧病

多年子身在滬昔時文武員弁僚幕散居各處刻  
正一面招致一面搜求但得有三二可恃之人相  
助爲理卽行飛速就道至川省亂事初因倡言保  
路奸民乘機轉相煽惑明白士紳被眾脅迫不敢  
主持正論遂致釀爲亂階春煊謹當恪遵 諭旨  
善爲解散茲擬先撰文告剴切勸諭電飭川省地  
方宜先行曉示川民果知悛悔斷不忍兵力從事  
以期仰副 朝廷拯民塗炭之至意惟現在亂象  
漸成省外亦經滋蔓非帶得力兵隊前往亦不足  
以攝匪膽而樹聲威擬請 旨飭下兩廣總督張

鳴岐轉告第二十五鎮統制官龍濟光抽撥得力  
滇兵按照新軍營制編成步隊兩營配齊槍械乘  
輪逕赴宜昌以備調用龍濟光能否自行統領前  
來抑交由碣石鎮總兵吳祥達統率赴川由張鳴  
岐自行酌辦一面請飭下度支部籌撥的餉源源  
接濟庶足以備緩急而免臨時誤事除將啟程日  
期另行奏報外謹請代奏

宜昌端大臣來電 七月二十五日 並致澤公

頃據川東道徑電稱省匪未四竄銅大皆安靖川  
東防軍有裕道需所統五營零星填紮二十餘里

現商該道可勉抽一營援省須半月調頃奉黔撫  
電亦派新兵兩營來川過渝可會裕軍同赴省調  
齊嘉定張統領已專足知照並稟知季帥能否遞  
到尙無把握渝商號接省號十八信云城門每日  
開一點鐘城內平靜鋪面全開並開倉濟食城外  
民團蟻聚搜截公文郵件若商信則放行日內順  
流浮下小板甚多上寫逆黨名號功成語川江無  
大隊只水警甚單不足恃渝謠紛起人心惶惶急  
盼軍艦到等語又據瀘州電稱省城東門外匪黨  
被馬隊擊退至簡互有傷亡南門外大股廣聚道

路仍梗資陽上四十里臨江等處匪黨紮滿搜出  
公伴卽殺並有速下資之謠等語謹聞

雲南李仲仙制軍來電

七月二十五日

並致內閣軍諮府度支部陸軍部

准盛大臣禡電詢商援川一節查川風釀久愈熾  
川匪乘機愈熾此次川黨反拒匪黨於中取利商  
民各顧身家而仍受挾反抗者一則惑於洋禍新  
謠一則中於重捐夙怨確治亂首曲怨商民事能  
分解亂可卽甯探聞初一罷抗初六尙暗通貿易  
其中挾詐情隱已可類推中路防營早經調省省  
外兵隊分紮更稀此時首要拏事發難收不慮士

黨衝突慮在匪黨燎原趙督近電但言攻署若圍城屬實城外陸軍廠庫能無意外變故城圍若十日卽解內平外理兵少可招無待鄂救否則內外喫緊糧缺心亂恐難久支不獨滇兵四十日程赴援不及卽鄂兵能二十日趕到亦恐無濟是目前定亂遲速全視該省軍警內容滇疆阻塞徵調信艱西南兩防界川十餘州縣駐兵最散最單近年川匪竄擾平日已苦防疏此時戒嚴更急就近邊兵無可抽撥論援則緩不濟急論勦則局勢未定以不習之客軍卽能兼程疲進輕重措手極難惟

川事如此滇雖窘困義當竭籌 朝意如以攻勦  
兩端屬滇預備則滇擬由省抽調較爲可靠之新  
舊軍隊合爲千人遴派幹將統之馳紮敘府以防  
備剿遙助聲威川垣亂定卽撤未便代剿零匪川  
垣有變則星馳赴救再備後軍二三千人分期繼  
進專任一路攻剿事由滇督指揮遵 旨而行剿  
堵決定但能任滇軍以平匪定亂之事不得爲其  
他牽掣以及事後苛繩譏彈軍餉儘力接濟不敷  
電請添撥因亂起於川責在該地方官不得藉端  
貽誤此須 朝廷審察緩急明示方略 廷諭川

督認決可否而後滇兵進可有功動亦無咎若但圖應一時難濟之急不爲謀定而動之籌爲川爲滇似均非策除電詢趙督確探亂耗外先以愚見陳覆如何進止專候 朝命

廣西沈幼嵐中丞秉堃致內閣請代奏電

七月二十六日

恭讀本月二十三日兩次電傳

上諭敬悉川省

變亂

朝廷焦慮殊深君父之憂臣民所共秉堃

久官川省略悉民情當此事變發生何敢苟安緘

默謹陳管見聊備

聖裁竊聞川省此次致變之

原實因鐵路收歸

國有原附本不無損失商民

疑懼遂滋事端查川省自辦鐵路始於光緒三十年由前督錫良奏准辦理所收租股與零星勸集之股開辦較各省爲先收數較各省爲鉅無論貧富貴賤男女老幼人人皆經投資人人皆認自辦實與粵省之股出商富鄂省之集股無多湘省之先辦勸股甫辦租股者情形各別人民視財如命一聞國有各懷生命之憂雖諭旨惶惶婦孺終難其喻且粵路股票從優發還六成其餘四成並准發給國家無利股票湘鄂商股均准照股發還而湘路所籌租米鹽房各股旣奉明旨停

抽其已收之股又奉 明旨准分別作爲民股及  
地方公股故湘鄂粵三省人民已曉然于朝廷恤  
民之厚澤經國之遠圖不復妄生異議至川省則  
集股旣早且久股數之多股民之眾復在各省之  
上委因經理非人虧倒鉅款多歸無著用人不當  
其罪止於被用之人而多數小民血本被蝕則其  
疾痛而呼父母亦屬恆情此次收歸 國有宜昌  
實用工料四百數十萬准給 國家保利股票現  
在七百餘萬願否入股仍聽其便 朝廷體恤固  
已備至川民惶惑仍未解除殆以商民被倒之款

如何追賠宜昌已用之款不願入股能否給還郵  
傳部尙未籌畫宣示人民以缺望而生憂疑匪黨  
乃乘機而肆煽惑現在辦法與其先剿亂民以戢  
變端何如先定民心以孤匪勢辦理得法無待用  
兵四川生齒最繁省城向無囤糧閉城數日卽有  
乏食之患電綫旣已不通城外亂民數萬 朝廷  
鞭長莫及城中危險可知萬一官吏受窘道路不  
通謠詠紛傳到處響應爲禍不可思議現旣先後  
奉 諭派令端方督兵前進岑春煊會辦勦撫  
朝廷除蒔安良備極憂勤兼蒞愚意擬懇 天恩

明降諭旨飭令郵傳部飛飭川漢銀行分備銀兩  
交由該大臣等散還零星民股其川路虧倒股本  
亦併飭部墊認先按股票散還追繳歸款由郵傳  
部電飭重慶道府刊印謄黃飛速馳遞四川省城  
張貼通諭 天語昭宣人心自定部任墊款爲數  
無多而安民止亂免煩兵力爲利實大川民食毛  
踐土具有天良又見股本有著准還現銀誠信旣  
孚自必相率解散各安生業然後捕治爲首亂黨  
辦理或易得手冒昧上陳伏乞代奏

七月二十五日奉

旨沈秉堃電奏川省變亂謹陳管見擬請飭郵傳部分  
備銀兩散還零星民股其川路虧倒股本並飭部  
墊認按股散還追繳歸款等語著郵傳部速議具  
奏欽此

川督趙季帥致內閣請代奏電

七月二十六日

川省劣紳藉路謀逆及分別勦撫情形已於咸漾  
兩電具陳在案省中現已陸續開市開課人心略  
定惟外縣匪徒紛紛繼起各處皆數千人或萬餘  
人雖分頭派兵援勦而匪多兵少不易廓清尤難  
者匪敗則散處爲民兵去則聚集爲匪顧此失彼

疲于奔赴前日雙流縣被圍三日甫經擊退並追  
勦至二十里之黃水河地面不意又有大股匪徒  
接踵而至該匪等槍礮甚夥復得地勢我軍射擊  
頗難現正飭增兵應援合力兜擊而他處州縣迭  
來警報溫江尤急傷我軍士多人查此情狀非得  
厚集兵力扼守要路一面派遣大枝勁旅分途截  
勦不易爲功故我軍雖連戰連捷然亦頗有傷亡  
兵本不足死一人卽少一人之用難於充補匪則  
前仆後繼遍地皆是且此時所擾亂者尙係成府  
十六屬及西南邛蒲等州縣已有不暇兼顧之勢

倘更蔓延勾結川東北亦同時響應則益難措手  
前奉十七日諭旨飭鄂省添派得力軍隊數千  
人來川暫歸爾豐節制調遣仰見廟謨深遠無  
任感戴惟聞軍部派有軍艦一艘鄂省派有陸軍  
一標軍艦原防水面而川河淺急不易行駛宜坐  
鎮重慶以壯聲威陸軍一標僅一千五百餘人以  
目前事勢而論實覺單弱亦知客軍遠征籌度維  
艱惟兵力厚則戡定速兵力薄則牽制多用兵貴  
有先聲該匪徒等若知大兵雲集其已聚者或可  
聞風解散未發者亦當自行消弭川東南一帶卽

可藉資鎮懾本省之兵即可併力攻勦昨已電商  
鄂督尙未得覆合無仰懇 天恩飭下鄂督瑞澂  
再增派步兵兩標尅期馳援如鄂省實難增調請  
飭由近畿各鎮酌派得力軍隊迅速來川以維大  
局爾豐爲速平匪亂保全危疆起見不勝迫切待  
命之至謹請代奏

武昌瑞制軍來電

七月二十六日

並致澤公

大部會奏接收粵路股款六成給現銀四成無利  
股票本已格外體恤乃人民鮮顧大局易於煽惑  
路事風潮一觸卽發前見堅帥與大部及午帥歌

魚兩電似已煞費經營聞大部堅持未允亦具苦衷激本未便妄參末議第川亂正劇該黨等尙四處煽動現有龔斡辰等在香港演說勾煽若不將粵股早日解決誠恐別生枝節所損更多據激管見縱不能盡如股東之意亦當稍予通融俾鼓煽者無所施其伎倆似於大局不無裨益是否仍乞示復

內閣寄貴州沈撫台上海岑宮保電

七月二十六日

奉 旨岑春煊電奏悉所陳川事辦法尙合機宜著卽選帶得力員弁星馳就道所有川省水陸各

軍及各省所派赴川援軍俟岑春煊抵川後一併歸該督暫行節制調遣至所請飭龍濟光抽撥得力滇兵按照新軍營制編列步隊兩營配齊槍械乘輪逕赴宜昌以備調用龍濟光能否先行統領抑交由碣石鎮總兵吳祥達統率赴川等語著張鳴岐酌量辦理迅速電奏並著度支部籌撥的餉源源接濟岑春煊未到川以前仍著端方督隊前進迅解城圍該衙門知道欽此

上海岑宮保致內閣請代奏電

七月二十六日

奉 命赴川會辦勦撫昨將籌畫大概情形電陳

在案新授雲南藩司高而謙昨日到滬該員前隨  
春煊在晉辦理教案嗣後隨往川粵相處最久情  
志交孚其材識品節早在 聖明洞鑒之中今川  
事緊要命春煊卽刻起程倉猝成行急切無人佐  
理仰懇 天恩准令高而謙隨同春煊赴川俟川  
事辦有就緒再赴滇任又奉 命赴川沿途文牘  
須有關防方足以昭信守惟印文應如何刊刻請  
旨示遵謹請代奏

蘇撫程中丞德全致上海岑宮保電

七月二十六日

聞公奉 命莅川爲桑梓額手想盡籌密勿舊地

重來撥霧見天當在即日但勦撫必分良莠 諭  
旨甚明鄙意因路事爭執而後有附和之亂民既  
有亂民必不獲已而出於勦既勦之後設路事仍  
少方針則隱患依然潛伏故所勦者必係暴動之  
亂徒決非爭持之紳士并爲一譚羣情必激目前  
尤要者則當以勦匪必分良莠爲一事宣示路事  
方針爲又一事歷年各省爭持路議雖於 朝廷  
辦事苦衷容有未喻然人民忠愛之忱亦未可盡  
沒川省事同一律似未可盡誣爲匪我公治蜀夙  
譽神明今亂象初萌正需援手德全久睽鄉里家

居雲陽距省尤遙在省士紳均非素識雖經迭電  
議局及同鄉京官設法勸導迄未少效負疚方深  
公啟節度在目前敢獻臆忱藉資流壤并盼指示  
訐謨俾資接洽曷勝翹企

川督趙寄軍諮府電

七月二十六日

川人爭路志念甚堅諸逆黨卽利用此機關盡力  
鼓吹數月來設立同志會幾遍全省以路亡川亡  
之危詞固結人民之團體初則罷市罷課後乃抗  
捐抗糧相繼實行四門釐稅概不完納解庫款項  
扣存不交最後則刊布川人自保商榷書隱然宣

布獨立并偵悉先期約合省外民國會匪於十六日舉事當於十五日將該逆紳等誘獲署中以覘外間動靜城中卽時鳴鑼聚眾約萬餘人來撲督署各街預先派有軍隊彈壓阻之不可蜂擁破門而入衛隊開槍傷斃十餘人始行散退當晚卽有附近民團聚眾撲城自十六日以後成屬十數州縣之鄉團暨各處匪徒勾結先後麇集動輒累萬盈千聲言同志會只因來救羅綸諸人旂幟刀矛抬槍火礮所持不一無日不在戰陣中陸防兩軍分頭攻擊雖屢戰屢勝兵士亦有傷亡而此撲彼

起疲於奔赴若蔓延日久川東南恐亦不免同時  
擾亂則更難於分布前奉諭旨著湖北派得力  
軍隊數千人暫歸爾豐節制調遣嗣聞鄂軍派遣  
一標實覺單弱並慮川省幅員遼闊匪蹤遍地非  
厚集兵力不足以資鎮懾而竟全功擬請由鄂省  
加派步兵二標如鄂省實難增調或於近畿各鎮  
酌量增派昨已電請內閣代奏仍祈大部統籌全  
局設法維持俾令軍備充實攻守裕如地方早就  
安謐大局幸甚

同日奉

旨成都被匪圍困勢甚危迫已飭鄂軍前往赴援惟路長且險誠恐緩不濟急著沈瑜慶酌派得力兵隊迅卽開拔尅期抵川毋稍延緩該軍隊抵川後暫由趙爾豐節制調遣欽此

上海岑宮保來電

七月二十七日

茲將布告川省全文電達其文云四川全省道府廳州縣武營知悉春煊奉 命入蜀會同督院辦理勦撫事宜現先撰告蜀中父老子弟文專電傳布地方文武應卽刊印多張加蓋印信張貼城鎮鄉村使人民共喻春煊之意其不通電報處所卽

由鄰封專人遞送一體辦理地方文武有維持治安之責務卽切實勸導並選公正士紳講演以期早日解散自此電到後地方人民苟非實行倡亂不得妄加捕治其因亂事拘拏在先者苟其地業已安靖應擇情節較輕者量予保釋以省拖累卽情節尤重必不可原只許暫行羈留候春煊到後再行判決不得擅行殺戮但望上下共釋猜嫌庶或於春煊未到以前卽致救平 國家之幸地方之幸出力官紳自應擇尤請獎如奉行不力或貪功生事一經覺察立予嚴懲接此電後卽將辦理

情形隨時報告勿得隱飾蜀中父老子弟文如下  
春煊與吾蜀父老子弟別九年矣未知父老子弟  
尙念及春煊與否春煊則固未嘗一日忘吾父老  
子弟也乃今丁此不幸之事使春煊再與吾父老  
子弟相見頻年契闊之情竟不勝其握手歔歔之  
苦引頸西望不知涕之何從吾父老子弟誠一思  
之春煊此時方寸中當作何狀耶春煊衰病侵尋  
久無用世之志然念及蜀事糜爛吾父老子弟正  
在顛連困苦之中不能不投袂而起是以一奉  
朝命無暇再計刻日治行匍匐奔赴第邇蜀相距

六千里而遙斷非旦夕可至郵電梗塞傳聞異辭  
苟不爲耳目之所聞見何能遽加斷決則此旬月  
閒吾父老子弟所身受者又當如何此春煊所以  
寢不安席食不甘味者也今與吾父老子弟約自  
得此電之日始士農工商各歸其業勿生疑慮其  
一切未決之事春煊一至卽當進吾父老子弟於  
庭開誠布公共籌所以維持挽救之策父老子弟  
苟有不能自白于 朝廷之苦衷但屬事理可行  
無論若何艱鉅皆當委曲上陳必得當而後已倘  
有已往冤抑亦必力任申雪不復有所瞻徇父老

子弟果幸聽吾言春煊必當爲民請命決不妄戮  
一人朝廷愛民如子斷無不得請之理如其不  
然禍變相尋日以紛拏是非黑白何從辨析春煊  
雖厚愛吾父老子弟亦無術以處之父老子弟其  
三思吾言勿重取禍以增益春煊之罪戾卽有一  
二頑梗不化之徒仍復造端生事不特王法所不  
容當爲吾父老子弟所共棄則宜屏弗與通使不  
得施其煽惑之技而春煊亦將執法以隨其後矣  
至蜀中地方官吏已電囑其極力勸導勿許生事  
邀功以重累吾父老子弟春煊生性拙直言必由

衷苟有欺飾明神殛之吾父老子弟其幸聽吾言  
乎企予望之

又

七月二十七日

連日採取輿論敬證以 諭旨竊謂目前辦法當  
標本並治業已電奏請 旨應乞代陳宸邸明降  
諭旨語意不妨牽就而事實未稍變更爲目前  
解圍之急策春煊非好爲長慮卻顧但事變萬端  
殊難逆料肺腑之愚用再上瀆倘不得請春煊實  
無辦法不敢冒昧從事現定二十八赴鄂候 旨  
並聞

宜昌端大臣致內閣請代奏電

七月二十七日

頃據重慶商會總協理趙城璧曾鼎勳暨紳學界全體公電稱使節奉命入川羣情歡躍路事陡變波及全川追念禍由慘痛曷極刻下事機萬分危迫仰懇使節速臨以定人心而挽浩劫等語渝城望救如此之殷且味來電語氣川人頗有悔禍之心非速往救援無以繫羣倫之望端方日內部署鄂軍進行均已就緒惟鄂軍一標旣須援省又宜顧渝兵力實有不敷湘陝黔三省援軍應請電旨催令尅期進行以資接應而厚聲援請代奏

貴陽沈藹澹中丞寄內閣請代奏電

七月二十七日

川東變事猝發據川東道朱有基電告成都圍困  
請速派軍赴援復准端大臣方宜昌來電亦以黔  
蜀毘連赴援較近迅望迫切以遏亂機各等因查  
黔中東北兩路均與川邊接壤每歲餉項又專恃  
川協雖兵力不敷分派亦斷無坐視之理恭讀電  
傳諭旨疊派岑春煊端方先後入川相機勦撫  
現在峽道艱阻軍隊舟行拖帶匪易兩大臣輕裝  
西行川軍旣不得用他省援兵又難尅期黔滇較  
邇尤不能不先其所急現已酌派徵軍營管帶董

福開撥帶得力槍隊千人尅日開赴重慶聽候岑  
端兩大臣到日指揮一面嚴飭沿邊文武實力防  
範以斷匪黨分竄之路黔中餉絀兵單艱窘萬狀  
此次援師出境勢不得已惟望 朝廷威德所被  
感格頑愚則鄰疆同受其福所有派隊赴川各緣  
由除分咨外乞代奏

宜昌端大臣來電

七月二十七日

並致澤公

今午接夔州府感電稱頃得資州朱牧電稱聞省  
城東路已通惟南門餘匪尙多等語特聞

貴陽沈中丞瑜慶來電

七月二十七日

本日奉電 旨徵兵一營黔省已於有日行其在  
遵義防隊一營已令就近先行因緊急不敢拘泥  
也管帶董福開江南陸師學生江西贛州人頗奮  
勉無習氣並電告岑端二公矣本省已另令徵兵  
填紮以固邊防

寄上海岑宮保 七月二十七日

資電東門解圍人心大定趙電奏已到公示稿請鈔寄  
當呈閱使知公威望足以懾人馬道汝驥次帥許其能  
此次始末均了然已鈔案派其到鄂公如帶往可資臂  
助

廣州張堅伯制軍來電

七月二十七日

奉 旨飭龍濟光抽撥得力滇兵兩營由粵乘輪  
逕赴宜昌現擬五六日內先行開拔一營約五百  
餘人請飭招商局速派輪船一艘立即來粵運送  
至滬並飭備江輪一艘在滬等候接運前赴宜昌  
派定何輪來粵並乞電示

寄上海岑宮保武昌瑞制軍宜昌端大臣長沙余中丞  
廣州張制軍

七月二十七日

本日接趙季帥漾電奏略云十五夜民團數千人到城  
下據稱同志會調令十六進城是逆謀已非一日連日

各匪團計有溫江邛縣崇慶灌縣成都華陽雙流新津  
邛州蒲江大邑等處每州縣又分多起民匪混雜或萬  
人至數千人不等焚掠搶劫附省居民紛逃訊據獲匪  
或供係同志會召集或稱係羅蒲大人調來保護十四  
已暗中齊團亦有得同志會調兵木籤因羅蒲被拘特  
來保護救援並要求從此不納糧稅否則定圍城攻打  
當經調派各隊一面守城一面分路進剿仍將逆謀情  
形曉諭解散免致愚民誤犯乃各團恃眾圍城放槍我  
軍回擊始退嗣有大股盤踞距省五十里之龍泉驛山  
頂列礮揚言攻城我軍黑夜奪占山頂獲砲械無算西

路犀浦中和場等處復有聚匪圍攻雙流縣城焚燒衙  
市我軍往援接仗數次一晝夜圍解分竄各匪先後擊  
退刻金堂什邡漢州等處又有警告我軍自十六至今  
連戰七日防擊刻無暇晷爾豐隨時激厲重賞將士用  
命擒斬奪械甚多自十六各路電斷文報皆被截阻搜  
殺各處匪徒益集迹其設伏守險圖東西要道使我坐  
困必有梟傑主謀指使西充漢州等匪猶有犯省之說  
備多力分俟城守稍固卽抽隊雕剿以圖廓清凡陣獲  
被脅愚民均善言開導省釋俾勸告鄉里勿誤觸罪戾  
爲解散之計聞彼黨密派多人運動各省諮義局及京

外官紳意圖淆亂黑白爾豐通電各省宣布其罪以免  
誤會牽動現於藩署飭設籌防局妥爲辦理綜核各路  
電久不通前日將簡匪擊退始專馬至資州發電是以  
稍遲請代奏特聞

愚齋存稿卷第八十三